

Zachäus

's Finanzamt isses, wo uns heit
vun finanzieller Lascht befreit.
A frieher schunn zu Jesus Zeit
gab es so gewisse Leit,
die sinn zu dem Vergnüge kumm
un hann die Stei're eingenumm.

Die war'n e Art Finanzbeamte,
die man aber Zöllner nannte.
Un die hann iwwerall gerafft
un in de eigne Sack geschafft.

Un wie ehr eich jo denke kenne
war kää einziger vun denne
bei de Leit gut ansieh.
Un kam so äänner irg'ndwo hie,
so hann se all die Nas gerümpft
un kräftig iwwer ne geschümpft.

Bei denne Zöllner is so ääner,
e großer Gauner, doch e Klääner
vun Gestalt, Zachäus heißt er
un wie kä ann'rer do bescheißt er,
wann er Stei're eikassiert.
Am liebschte hänn se ne massakriert.

Damals war's, in Jericho,
Jesus is dort eingezoo,
weil er war grad uff Tournee,
denn er wollt mol widder seh,
ob die Fans noch zu ihm steh.
Sie taten es, wie je und eh.

Un an de Stroße standen Masse,
die wollten sich's net nemme lasse
debei zu sei, wenn er erscheint.
Sie hann getobt, vor Frääd geweint.
So wie's a heit noch will die Sitte,
is e Star in uns'rer Mitte.

Zachäus, ehr wisse, der is klää,
will aa gucke un streckt die Bää
un de Hals macht er ganz lang.
„Ich kann nix sehe!“, ruft er bang,
denn vor ihm stehen große Leit.
„Do vorne kummt er, s is soweit.
Un ich steh do, ich kläner Muckel
un guck de Leit nor uff de Buckel!

Ach liewer Gott, was mach ich bloß!
So helf mer doch, die Not is groß!“
Un Gott in seiner großen Güte
zeigt ihm e Feigebaam, der blühte
dort, wo schunn im näscht Moment
Jesus drunner laafe kännt.

Un schwupp di wupp, er macht e Satz
un nemmt im Feigebäämche Platz.
’s hat grad gelangt, denn korz denoo
kommt Jesus um die Kurv gezoo.

Do guckt er hoch un denkt: „Ach Gott,
ob der Baam do e Krankheit hott!
Ach nä, do sitzt jo änner drin!
Das kann bloß de Zachäus sinn!

Kumm erunner, kläner Mann,
weil ich e Bitte an dich hann!
Lad mich ei, zu dir nach Haus
un geb mer e Espresso aus.
E Prosecco kann’s a soi
oder e gutes Gläsje Woi.“

Zachäus, als er’s hat vernumm
is schnell vum Baam erunnerkumm,
hat sich gefräät iwwer die Ehre,
dass Jesus wollt bei ihm einkehre!

Doch was hann do die Leit gesaa?
De Atem hat’s ne fascht verschlaa:
„Wie kann der bloß mit so äm spreche?“
„Un dann noch zu dem geh un zeche?“

„Es is e Schand, was do passiert!“
All hann se g’scholl un war’n düpiert.

Zachäus aber, der war glicklich
und so hat er augenblicklich
Jesus in die Hand versproch:
„Ich wääß, ich hann so viel verboch.

Drum will ich nicht mehr sündige
und gleich als Zöllner kündige!
Un vum mei’m Geld, es wär mei Rente,
will ich die Hälft de Arme spende!

Vun wem zu viel ich hann kassiert,
der kriecht’s mit Zinse, garantiert
schun moje frieh vun mir zurück.
Annere helfe: das is Glück!“

Un Jesus saat: „Das Heil kehrt ein!
Hasche noch e Gläsje Wein?
Dann muss ich uff de Weg mich mache.
Ich hann noch so viel ann’re Sache
zu erled’che - weil schunn ball
kännt’s e End hann - Knall uff Fall!“

Doch das is e anner G’schicht,
drum endet jetzt hier mein Bericht!

*Wie immer, wann ich fertig bin,
reißt’s mich zu me Liedche hin.
Auch diesmol hann ich’s net geschafft
mich zu entziehen dieser Kraft!*

Lied zum Text (La le lu)

La le lu - willsch du fer’s Gewisse Ruh
du net raffe un bescheiße
denk immerzu

Es is jo so - so viel arme Leit sinn do
duh ne helfe un dann wersch du
zufriede un froh

Wie uns die Geschichte
vom Zachäus lehrt
kann vieles mer richte
was vorher war verkehrt

La le lu - Jesus guckt von owe zu
un er is genauso zufriede
so wie a du

Er sat dann zum Vadder
der dort oben thront
dass ich war dort unne
das hat sich gelohnt

La le lu - willsch du fer's Gewisse Ruh
du net raffe un bescheiße
denk immerzu

Es is jo so - so viel arme Leit sinn do
du ne helfe un dann wersch du
zufriede un froh